

Broj: 131/12

Datum: 14.05.2012.

PREDMET: Poziv za javnu debatu "U susret Olimpijskim i Paraolimpijskim igrama u Londonu"

Poštovani/a,

Centar za kulturu dijaloga, u **ponedjeljak 21.05.2012. godine u Hotelu „Grand“ u Sarajevu**, pod pokroviteljstvom Ambasade Velike Britanije i Njegove Ekselencije ambasadora gospodina Nigela Caseyja, **organizuje Javnu debatu „U susret Olimpijskim i Paraolimpijskim igrama u Londonu“**. **Ambasador Velike Britanije će održati pozdravni govor i ukazati na ozbiljnost olimpijskih i paraolimpijskih igara, mirovni aspekt igara kao i na važnost ovakvih debata za bh. društvo.**

Cilj javne debate je podizanje svijesti javnosti, posebno mladih o paraolimpijskim igrama i poruci koju paraolimpijske igre nose. Vaš odziv na ovu Debatu znači puni doprinos podizanju svijesti bh. društva o tegobama ljudi koji nas okružuju. Nerijetko to su i veoma mladi ljudi.

Svjedoci smo brojnih poteškoća sa kojima se osobe sa invaliditetom svakodnevno u BiH suočavaju: od fizičkog pristupa brojnim objektima i institucijama do provedbe zakona kojima im je osigurano pravo na zapošljavanje. Pored toga, invalidne osobe su često suočene sa nerazumijevanjem društva, u kojem su invalidi „teret“, „opterećenje“, „poreski izdatak“...

O pravima i potrebama invalidnih osoba bh. društvo sluša najviše 3.12. kada se obilježava Međunarodni dan invalida. Ostatak godine, invalidne osobe ostaju izvan medijske pažnje, a time i pažnje cjelokupnog društva u BiH. Čak ni paraolimpijske igre nisu medijski dovoljno praćene jer ne postoji svijest o važnosti tako značajnog sportskog događaja za BiH, koja je nakon rata suočena sa velikim brojem invalida.

Ne postoji ni dovoljno razvijena svijest da invalidne osobe zaslužuju posao, normalan pristup svim objektima kao i druge osobe, pravo na život dostojan čovjeka. O tome je posebno važno educirati mlade, koji zbog neaktuelnosti teme, često bivaju nesenzibilizirani za potrebe ove važne skupine bh. društva. Skupine koja često ostaje na margini društva, a koja može mnogo toga ponuditi BiH. Rješenje problema invalidnih osoba nije samo rješenje problema te skupine, već i rješenje problema cjelokupnog bh. društva i lagano približavanje Evropskoj Uniji.

Razgovor o bilo kojem problemu, osnovni je korak za rješenje problema, i zbog toga CKD organizuje Javnu debatu „U susret Olimpijskim i Paraolimpijskim igrama u Londonu“. Tokom javne debate, mladi ljudi iz cijele BiH će prezentirati viđenje koncepta paraolimpijskih igara, probleme sa kojima se invalidne osobe suočavaju, i predstaviti moguća rješenja problema.

